

Pak Ship Ban

पहलगाम आतंकी हमले दे बाद प्रतिक्रिया दे तौरा पर कीती जा'रदिएं कारवाइएं दे सिलसिले गी जारी रखदे होई भारत नै पाकिस्तानी समुंद्री जहाजें दे भारतीय बंदगाहें च दाखल होने जा इत्थुआं जाने पर बंदश लाई दित्ती ऐ। एह फैसला भारतीय संपत्ति, समेयान ते सरबंधत ढांचे दी सुरक्षा गी जकीनी बनाने लेई लैता गेआ ऐ। जहाजरानी सरबंधी महानिदेशालय दा आखना ऐ जे एह रोक अगले हुक्मै तोड़ी जारी रौहग ते जित्थें कुतै एहदे च छूट देने दी लोड़ नेई कीती जाग, तां मामले दी गंभीरता गी दिखदे होई दित्ती बी जाई सकदी ऐ। एहदे इलावा भारत नै पाकिस्तान कन्नै जियां जे पैहले बी खबर दित्ती जाई चुकी दी ऐ, डाक सेवा ते आयात पर बी बंदश लाई दित्ती दी ऐ। केन्द्र सरकार दे इस फैसले दा मुख्य भरै च सुआगत ते समर्थन कीता जा'रदा ऐ। जम्मू दे बपारिएं बी इस फैसले दी सराहना कीती ऐ ते आखेआ ऐ जे बन्ने पारा चलाए जा'रदे आतंकवाद खलाफ एह कारवाई इक जरूरी गैह ऐ। बपारिएं दा आखना ऐ जे देसे दी सुरक्षा कोला उप्पर कोई कारोबार, बपार दा फायदा नुक्सान नेई होई सकदा। पलैश:— हुनै हुनै थहोई दी जानकारी मूजब राष्ट्रपति लोरंसो नमीं दिल्ली दे हैदराबाद हाउस पुज्जी गे न ते प्रधानमंत्री नरेन्द्र मोदी हुंदे नै उंदी गल्लबात शुरू होई गेई ऐ। मेद कीती जा'रदी ऐ जे गल्लबात दे बाद दौनें मुख्यें बश्कार राई—बाई, इलाज दे देसी तरीके पद्धतिएं ते कला ते संस्कृति दे क्षेत्र च समझौते होई सकदे न।

<><><><><><>

LoC Firing

कल रातीं कब्जा रेखा पर पाकिस्तानी सेना आस्सेआ कीती गेदी गोलीबारी दा भारतीय फौज नै बनकदा परता दित्ता। रक्षा सूत्रें दस्सेआ जे पाकिस्तानी सेना नै कश्मीर दे कुपवाड़ा, उड़ी ते अखनूर सेक्टरें च कब्जा रेखा पर बिजन कुसै उकसावे दे लौहके थेआरें कन्नै गोलीबारी कीती जेहदा भारती सेना नै पूरी तगड़ेयाई कन्नै बनकदा परता दित्ता।

<><><><><><>

Rana EMRS

जनजातीय बच्चों की शिक्षा आले जतनें गी होर मजबूती देने दे मकसद कन्नै मंत्री जावेद अहमद राणा होरें पुंछ दे एकलव्य आदर्श रिहायश स्कूल ढांचागत परियोजना ते शैक्षिक गतिविधिणं दा व्यापक जायजा लैता। उनें पानी ते बिजली सप्लाई जकीनी बनाने दियां हिदायतां दित्तियां। एह्दे अलावा उनें इदारे की होरने दुइए महत्वपूर्ण जरूरतें गी पूरा करने लेई गलाया। समें सिर कम्में गी मुक्कमल करने पर जोर पांदे होई मंत्री होरें जिला प्रशासन गी सारे शिक्षा इदारे दे ढांचागत परियोजना की प्रगति पर नेड़मी तक्क रखने लेई गलाया। उनें बेहतर ढंग सिर अमलावरी की महत्ता गी उजागर करदे होई खित्ते दे जनजातीय विद्यार्थिएं गी म्यारी शिक्षा सरबंधी सहूलतां हासल करोआने लेई गलाया।

<><><><><><>

Reasi-Catch the Rain

चला'रदे साफ सफाई ते स्वच्छता सरबंधी जल शक्ति अभियान कैच द रैन आली मुहिम तैह्ते रियासी दिशं डिप्टी कमीशनर निधि मलिक होरें केई सारी थाहरें दा दौरा लाया। साफ सफाई ते मरम्मत आले कम्में दा जायजा लैता। हफ्ते भर चलने आला एह् अभियान पैहली मई 2025 गी शुरू होआ हा। इस दरान रिवायती पानी आली थाहर पानी सरबंधी ढांचे ते पानी दे स्टोरेज टैंक बगैरा दा साफ सफाई आला कम्म होआ'रदा ऐ। डिप्टी कमीशनर होरें इस जतन दे महत्व गी उजागर कीता ते पानी दे संरक्षण पर जोर पाया।

<><><><><><>

E-Office

डिजीटल प्रशासन गी मजबूत करने दे जतन तैह्ते जम्मू दे अतिरिक्त जिला विकास आयुक्त शेर सिंह होरें इक बैठक लाइयै सारे तैहसील ते ब्लाक स्तर दे दफ्तरे च ई-आफिस की अमलावरी दा बैठक दरान जायजा लैता। डीआईओ संजीव कपूर होरें ई-आफिस बारे जानकारी दित्ती। सुधारें बारे गल्ल करदे होई एडीडीसी होरें आखेआ ते ई-आफिस कन्नै पारशिंता, कारकरदगी, जवाबदेही ते लोकें तगर सेवा पजाने आले सरिस्ते च सुधार होग। एह्दे राएं मैह्कमे बश्कार तालमेल बी बधोग।

<><><><><><>

Waves-Last Day

मुंबई च इसलै चला'रदा वेवस शिखर सम्मेलन अज्ज संपन्न होआ'रदा ऐ। अज्ज खीरले ध्याड़े फिल्म निर्माण पर किश सत्र ते सांस्कृतिक कार्यक्रम बी होंगन। चऊं दिनें दे इस सम्मेलन दा उद्घाटन प्रधानमंत्री नरेन्द्र मोदी होरें कीता हा। एह आयोजन भारत गी मीडिया, मनोरंजन ते डिजीटल नवाचार दे वैश्विक केन्द्र दे रूपै च स्थापत करने दी कोशश ऐ। आयोजन च 90एं शा मते देशें दे 10 जहार शा बद्ध प्रतिनिधि शामिल होए।

<><><><><><>

NTA

अज्ज देश भर च मैडिकल प्रवेश परीक्षा—नीट यूजी आयोजित कीती जा'रदी ऐ। एह परीक्षा विदेशें च 13 शैहरें सनें 5 जहार थमां मते केन्द्रें पर दपैहरी 2 बजे शा लेइयै 5 बजे तगर लैती जाग। राश्ट्री परीक्षा अजेंसी एनटीए दे मताबक परीक्षा लेई 22 लक्ख शा मते विद्यार्थिं पंजीकरण कराए दा ऐ। एनटीए नै विद्यार्थिं गी झूठिं सूचनाएं पर ध्यान नेई देने ते एनटीए दी वैबसाइट पर उपलब्ध सूचना पर गै भरोसा करने दी अपील कीती।

<><><><><><>

Handicraft-Awards

कपड़ा मंत्रालय दे दस्तकारिं सरबंधी विभाग दे विकास कमिशनर हुं'दे दफ्तरै बड़ी मती प्रतिश्ठा आहले राश्ट्री दस्तकारी अवार्ड 2024 लेई आवेदन मंग्गे न। 30एं ब'रें जां फही ओह्दे थमां बद्ध उम्मी दे कारीगर ते घट्टोघट्ट 10एं ब'रें दे तजुर्बे आहले कारीगर इस राश्ट्री अवार्ड लेई आवेदन करी सकदे न। इस्सै चाल्ली 20एं ब'रें तगर दे तजुर्बे आहले ओकड़े कारीगर जि'दी उम्र 50एं ब'रें जां ओह्दे शा मती ऐ, ओह् शिल्प गुरु अवार्ड लेई आवेदन करी सक³न। मंत्रालय आसेआ कुल 25 पुरस्कार भेंट कीते जा³न जि'दे चा 6 शिल्प गुरु अवार्ड ते 19 राश्ट्री अवार्ड हो³न। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर कन्नै राबता करी सकदे न जां

फही वैबसाईट [www-handicrafts-gov-in](http://www.handicrafts-gov-in) पर जाइयै मती जानकारी लेई सकदे न। योग्यता मानदंड, दिशा निर्देश ते होर दुए ब्यौरे इस वैबसाईट उपपर उपलब्ध न।

<><><><><><>